



Headline: Perdaya guna e-dompot
Publication/Portal: Sinar Harian
Date: 16 March 2020

Language: Malay
Section: Kedah
Page: 25

Perdaya guna e-dompot

Polis Kedah kesan taktik
baharu sindiket penipuan
dalam talian

Oleh ROSHILA MURNI ROSLI

ALOR SETAR

Polis Kedah berjaya mengesan taktik baharu sindiket penipuan dalam talian yang menggunakan kad pengenalan orang awam untuk mendaftar aplikasi e-dompot di negeri ini sejak Januari lalu.

Ketua Jabatan Siasatan Jenayah Komersial (JSJK) Kedah, Superintendan Elias Omar berkata, sindiket terbabit menawarkan bayaran sehingga RM300 bagi setiap akaun e-dompot yang berjaya didaftarkan.

Katanya, dalam tempoh Januari hingga Februari lalu, sebanyak 25 kertas siasatan telah dibuka melibatkan kerugian sebanyak RM600,000.

“Kita yakin sindiket ini mulai beralih ke aplikasi e-dompot kerana sistem bayaran tanpa tunai ini boleh digunakan di mana-mana sahaja sama ada untuk urus niaga atau mendapatkan tunai.

“Sehingga kini, seramai 50 orang awam telah dikesan menyerahkan kad pengenalan mereka untuk didaftarkan,”



Elias menunjukkan gambar suspek yang sedang dikesan untuk membantu siasatan kes penipuan menggunakan aplikasi e-dompot.

katanya ketika ditemui di Ibu Pejabat Polis Kontinjen Kedah di sini semalam.

Menurutnya, berdasarkan siasatan, sindiket tersebut menggunakan ejen untuk memperdaya orang awam bagi mendaftarkan e-dompot dengan menyasarkan golongan berpendapatan rendah.

“Mangsa pula tidak sedar bahawa akaun e-dompot mereka disalahgunakan untuk penipuan kerana semua urusan termasuk nombor TAC dihantar ke nombor telefon scammer berkenaan,” katanya.

Menurutnya, bertindak atas laporan yang diterima, pasukan Jabatan Siasatan Jenayah (JSJ) Kuala Muda berjaya

menahan dua lelaki tempatan awal bulan ini dalam daerah berkenaan.

“Ketika serbuan, kedua-dua suspek berusia 23 tahun itu sedang mendaftar kad pengenalan orang awam ke sistem e-dompot. Polis turut merampas enam buah telefon bimbit pelbagai jenis, 13 kad sim pelbagai telco serta enam keping kad ATM.

“Polis juga sedang mengesan seorang lagi suspek yang dipercayai berada di Bahau, Negeri Sembilan.

“Kepada mereka yang mempunyai maklumat berkaitan suspek terbabit boleh hubungi balai polis berdekatan,” katanya.